



REPUBLIKA E SHQIPËRISË
KOMISIONERI PËR MBIKËQYRJEN E SHËRBIMIT CIVIL

Adresa: Rr. "Abdi Toptani", ish-hotel "Drini", Tiranë

Tel/Fax 04 2226814; 22268142

Nr. 114/5 Prot.

Tiranë, më 26.04.2017

V E N D I M

Nr. 104, datë 26/04/2017

"Mbi përfundimin e procesit të verifikimit të zbatimit të vendimit të Komisionerit Nr. 165, datë 27.12.2016 dhe ligjshmërisë së veprimeve administrative të kryera gjatë procesit të emërimeve nga Drejtoria e Bujqësisë Korçë, prej datës 21.09.2016 e në vazhdim"

Në mbështetje të kompetencave ligjore të parashikuara në nenet 11, pika 1 dhe 14 të ligjit nr. 152/2013, "Për nëpunësin civil", i ndryshuar, si dhe nenin 34 e vijues të Rregullores, "Mbi procedurat e mbikëqyrjes/inspektimit", miratuar me Vendimin Nr. 17, datë 11.03.2015, të Komisionerit për Mbikëqyrjen e Shërbimit Civil, pas shqyrtimit të relacionit dhe mendimit paraprak të Drejtorisë së Çështjeve Juridike dhe Marrëdhënieve me Jashtë, në lidhje me verifikimin e zbatimit të vendimit të Komisionerit Nr. 165, datë 27.12.2016, "Për miratimin e raportit përfundimtar të mbikëqyrjes së administrimit të shërbimit civil në Drejtorinë e Bujqësisë Korçë dhe paralajmërimin e institucionit për të rregulluar gjendjen e ligjshmërisë", në institucionin e Drejtorisë së Bujqësisë Korçë,

VËREJ SE:

Me Vendimin Nr. 138, datë 30.12.2015, "Për kryerjen e mbikëqyrjes në lidhje me zbatimin e ligjit në procesin e administrimit të shërbimit civil, në Ministrinë e Bujqësisë, Zhvillimit Rural dhe Administrimit të Ujërave dhe në institucionet e varësisë që janë pjesë e shërbimit civil", Komisioneri për Mbikëqyrjen e Shërbimit Civil ka vendosur fillimin e procesit të mbikëqyrjes së përgjithshme në Drejtorinë e Bujqësisë Korçë, që është pjesë e shërbimit civil. Ky proces është përmbyllur me Vendimin Nr. 165, datë 27.12.2016, "Për miratimin e raportit përfundimtar të mbikëqyrjes së administrimit të shërbimit civil në Drejtorinë e Bujqësisë Korçë dhe paralajmërimin e institucionit për të rregulluar gjendjen e ligjshmërisë", të Komisionerit për Mbikëqyrjen e Shërbimit Civil, në të cilin është vendosur:

1. Të miratoj raportin përfundimtar të mbikëqyrjes së përgjithshme në lidhje me administrimin e shërbimit civil në Drejtorinë e Bujqësisë Korçë, i cili është pjesë e këtij vendimi dhe të paralajmëroj institucionin për të rregulluar situatën e

paligjshmërisë në zbatimin e ligjit nr. 152/2013, "Për nëpunësin civil", i ndryshuar, duke kërkuar zbatimin e detyrave që do të specifikohen më poshtë.

2. Njësia përgjegjëse, Departamenti i Administratës Publike si dhe njësia e burimeve njerëzore të institucionit të mbikëqyrur, duhet të marrin masa dhe të tregojnë kujdes, që procedurat që kanë lidhje me menaxhimin e shërbimit civil dhe janë kryer në mënyrë elektronike, t'i materializojnë ato edhe në formë shkresore, duke respektuar mënyrën dhe elementët që duhet të përmbajë kopja në letër e dokumentit elektronik, të përcaktuara në ligjin nr. 9880, datë 25.02.2008, "Për nënshkrimin elektronik", i ndryshuar, ligjin nr.10273, datë 29.04.2010, "Për dokumentin elektronik", si dhe në udhëzimin nr. 1, datë 31.12.2012, të Ministrit për Inovacionin dhe Teknologjinë e Informacionit dhe Komunikimit, "Për vërtetimin e kopjes në letër të dokumentit elektronik nga institucionet publike".

Me qëllim kontrollin e zbatimit të ligjit në administrimin e shërbimit civil nga nëpunësit përgjegjës, në përputhje me hierarkinë administrative, ashtu dhe nga institucionet e ngarkuara nga ligji për mbikëqyrjen e shërbimit civil, këto kopje duhet të trajtohen në përputhje me kërkesat e ligjit për arkivat dhe normat tekniko-profesionale dhe metodologjike të shërbimit arkivor në Republikën e Shqipërisë.

3. Për të rregulluar ligjshmërinë e procesit të ristrukturimit në institucionin e Drejtorisë së Bujqësisë Korçë, njësia përgjegjëse (DAP), në zbatim të nenit 50, të ligjit nr. 152/2013, "Për nëpunësin civil", të ndryshuar dhe nenit 111, 113, pika 1, të ligjit nr. 44/2015, "Kodi i Procedurave Administrative i Republikës së Shqipërisë", në lidhje me punonjësit ***** dhe *****, të cilët janë transferuar në një pozicion pune jashtë shërbimit civil, duhet të anulohet pjesërisht aktin administrativ nr. 2892/I prot., datë 22.06.2015, "Mbi transferimin e disa nëpunësve për shkak të ristrukturimit të Drejtorisë së Bujqësisë Korçë", duke vepruar si më poshtë:

- Të anulohet pika 3, e aktit administrativ nr. 2892/I prot., datë 22.06.2015, "Mbi transferimin e disa nëpunësve për shkak të ristrukturimit të Drejtorisë së Bujqësisë Korçë", në lidhje me transferimin e punonjësit ***** në pozicionin e punës, "Specialist", pranë Agjencisë për Zhvillim Bujqësor dhe Rural, i cili aktualisht është liruar nga shërbimi civil nëpërmjet institutit të dorëheqjes, ende pa u implementuar struktura e re e institucionit.
- Të anulohet pika 4, e aktit administrativ nr. 2892/I prot., datë 22.06.2015, "Mbi transferimin e disa nëpunësve për shkak të ristrukturimit të Drejtorisë së Bujqësisë Korçë", në lidhje me transferimin e punonjësit ***** në pozicionin e punës, "Specialist", pranë Agjencisë për Zhvillim Bujqësor dhe Rural, i cili vazhdon ende në këtë detyrë.
- Të nxjerrë aktin individual të lirit nga shërbimi civil, për punonjësin ***** për shkak të përfundimit të marrëdhënies së punës, në kuadër të ristrukturimit të Drejtorisë së Bujqësisë Korçë dhe në zbatim të pikës 8, të nenit 50, të ligjit nr.152/2013, "Për nëpunësin civil", i ndryshuar, t'i njohë punonjësit ***** të drejtën që brenda periudhës 2-vjeçare, nga data e përfundimit të marrëdhënies në shërbimin civil, të konkurrojnë si nëpunës civil për procedurën e lëvizjes paralele apo të ngritjes në detyrë, në pozicione pune të shërbimit civil dhe të njoftohet punonjësi për këto akte.

4. Njësia e burimeve njerëzore në Drejtorinë e Bujqësisë Korçë dhe personat përgjegjës, të ngarkuar nga ligji me detyrën e vlerësimit të rezultateve në punë, duhet të mbajnë

parasysh orientimet e Komisionerit, të cilat janë të materializuara në raportin e mbikëqyrjes, më qëllim kryerjen e vlerësimit të rezultateve në punë në mënyrë sa më objektive, duke e lidhur procesin me realizimin e detyrave konkrete të secilit nëpunës.

5. *Për kryerjen e këtyre veprimeve administrative, lihet afat 30 ditë nga marrja dijani për këtë vendim. Institucioni i mbikëqyrur dhe njësia përgjegjëse, duhet të zbatojnë këtë vendim duke u bazuar në orientimet e dhëna në përmbajtjen e raportit përfundimtar të mbikëqyrjes.*

Komisioneri për Mbikëqyrjen e Shërbimit Civil, me qëllim verifikimin e zbatimit të detyrave të lëna në Vendimin paralajmërues Nr. 165, datë 27.12.2016, të Komisionerit, si dhe verifikimin e ligjshmërisë së veprimeve administrative të kryera gjatë realizimit të procedurave për rekrutim, transferim, ngritje në detyrë, në Drejtorinë e Bujqësisë Korçë, prej datës 21.09.2016 që është momenti i verifikimit të kryer në kuadër të mbikëqyrjes e në vazhdim, me vendimin Nr. 33, datë 13.02.2017, *“Për verifikimin e zbatimit të vendimit të Komisionerit Nr. 165, datë 27.12.2016 dhe ligjshmërinë e veprimeve administrative të kryera nga Drejtoria e Bujqësisë Korçë, gjatë procesit të emërimeve, të kryera prej datës 21.09.2016 e në vazhdim”*, ka vendosur fillimin e verifikimit të zbatimit të Vendimit Nr. 165, datë 27.12.2016, *“Për miratimin e raportit përfundimtar të mbikëqyrjes së administrimit të shërbimit civil në Drejtorinë e Bujqësisë Korçë dhe paralajmërimin e institucionit për të rregulluar gjendjen e ligjshmërisë”*.

Verifikimi u realizua nëpërmjet vizitës në institucionin Drejtoria e Bujqësisë Korçë dhe subjekti u njoftua për fillimin e procesit me shkresën nr. 114/2 prot., datë 13.02.2017 *“Njoftim për fillimin e verifikimit”*.

Bazuar në procesverbalin e datës 15.03.2017, të mbajtur nga grupi i punës i Komisionerit dhe personat e kontaktit të institucionit, pas shqyrtimit të materialeve shkresore të administruara në përfundim të procesit të verifikimit, rezultoi sa më poshtë vijon:

- Në zbatim të pikës 2 të vendimit, Drejtoria e Bujqësisë Korçë me shkresën nr. 55 prot., datë 27.10.2017, e ka vënë në dijeni Komisionerin se janë zbatuar rekomandimet sipas orientimeve të lëna në Raportin Përfundimtar të Mbikëqyrjes dhe në Vendimin e paralajmërimit, konkretisht, lidhur me përshkrimet e punës (bashkëlidhur u administrua një model i përshkrimit të punës, sipas kërkesave ligjore).
- Në zbatim të pikës 3 të vendimit paralajmërues të Komisionerit, Njësia e Burimeve Njerëzore e institucionit i ka dërguar shkresë për bashkëpunim Departamentit të Administratës Publike me nr. 11 prot., datë 09.11.2017 për të rregulluar ligjshmërinë e procesit të ristrukturimit, në lidhje me punonjësit ***** dhe ***** , të cilët janë transferuar në një pozicion pune jashtë shërbimit civil, e konkretisht, në Agjencinë për Zhvillim Bujqësor dhe Rural.

Ndërkohë, në momentin e verifikimit, rezulton se, ka ndryshuar regjimi juridik i marrëdhënies së punës për nëpunësit e Agjencisë për Zhvillimin Bujqësor dhe Rural, duke i përfshirë ata përsëri në fushën e veprimit të ligjit për shërbimin civil.

Në rastin konkret, ky ndryshim, është pasqyruar në Vendimin nr. 877, datë 14.12.2016, të Këshillit të Ministrave, *“Për disa ndryshime dhe shtesa në Vendimin nr. 719, datë 31.10.2014, të Këshillit të Ministrave, “Për organizimin dhe funksionimin e Agjencisë për Zhvillim Bujqësor dhe Rural”*, ku përcaktohet:

- Pika 9: “Marrëdhëniet e punës së nëpunësve të AZHBR-së rregullohen në bazë të legjislacionit për nëpunësin civil. Marrëdhëniet e punës së punonjësve administrativë të AZHBR-së, rregullohen në bazë të dispozitave të Kodit të Punës”.
- Pika 17: “Për nëpunësit aktualë të AZHBR-së zbatohen dispozitat e nenit 67, të ligjit nr.152/2013, “Për nëpunësin civil”, të ndryshuar”.

Për të vënë në zbatim këto ndryshime, sipas pikës 5, të vendimit të sipërcituar, është ngarkuar Ministria e Bujqësisë, Zhvillimit Rural dhe Administrimit të Ujërave, Agjencia për Zhvillim Bujqësor dhe Rural, si dhe Departamenti i Administratës Publike.

Në këtë rast, duhet të mbahet parasysh nga njësia përgjegjëse fakti, që këta nëpunës, e gëzojnë statusin e nëpunësit civil që në momentin e deklaramit të tyre pranë Drejtorisë së Bujqësisë Korçë, sipas interpretimit që është bërë më lart nga Komisioneri. Ky fakt vlen për të përcaktuar kohëzgjatjen e punësimit të këtyre punonjësve në pozicionin e punës ku ata kryejnë detyrën, në momentin e deklaramit të statusit të punësimit pranë Agjencisë për Zhvillimin Bujqësor dhe Rural.

- Në zbatim të pikës 4 të vendimit paralajmërues të Komisionerit, lidhur me kryerjen e vlerësimit të rezultateve në punë në mënyrë sa më objektive, u evidentua se janë mbajtur parasysh orientimet e Komisionerit (bashkëlidhur u administrua një model vlerësimi pune, sipas kërkesave ligjore).

Për sa u parashtrua më sipër, pas përfundimit të afatit për zbatimin e detyrave të lëna në Vendimin nr.165, datë 27.12.2016, “Për miratimin e raportit përfundimtar të mbikëqyrjes së administrimit të shërbimit civil në Drejtorinë e Bujqësisë Korçë dhe paralajmërimin e institucionit për të rregulluar gjendjen e ligjshmërisë”, të Komisionerit, rezulton se nga ana e njësies së burimeve njerëzore të institucionit të Drejtorisë së Bujqësisë Korçë janë zbatuar të gjitha rekomandimet e lëna në vendimin paralajmërues.

Në përfundim të procesit të verifikimit në subjekt, lidhur me ligjshmërinë e veprimeve administrative të kryera gjatë realizimit të procedurave për rekrutim, transferim, ngritje në detyrë, në institucionin e Drejtorisë së Bujqësisë Korçë prej datës 21.09.2016, që është momenti i verifikimit të kryer në kuadër të mbikëqyrjes e në vazhdim, rezulton se nga ana e njësies së burimeve njerëzore të Drejtorisë së Bujqësisë Korçë, nuk u evidentua asnjë rast i nxjerrjes së ndonjë akti në kundërshtim me ligjin.

Për këto arsye:

Bazuar në nenet 11, pika 1 dhe 14 të ligjit nr. 152/2013, “Për nëpunësin civil”, i ndryshuar; nenin 90, të ligjit nr. 44/2015 “Kodi i procedurave Administrative i Republikës së Shqipërisë” dhe nenit 34 të Rregullores, “Mbi procedurat e mbikëqyrjes/inspektimit”, miratuar me Vendimin Nr. 17, datë 11.03.2015, të Komisionerit për Mbikëqyrjen e Shërbimit Civil,

VENDOSA:

1. Përfundimin e procesit të verifikimit për zbatimin e Vendimit Nr. 165, datë 27.12.2016 në institucionin Drejtoria e Bujqësisë Korçë.

2. Konstatimin e rregullimit të ligjshmërisë nga ana e njësisë së burimeve njerëzore të institucionit të Drejtorisë së Bujqësisë Korçë, duke zbatuar plotësisht rekomandimet e Vendimit Nr. 165, datë 27.12.2016, *“Për miratimin e raportit përfundimtar të mbikëqyrjes së administrimit të shërbimit civil në Drejtorinë e Bujqësisë Korçë dhe paralajmërimin e institucionit për të rregulluar gjendjen e ligjshmërisë”*,
3. Konstatimin e ligjshmërisë së veprimeve administrative, të kryera gjatë procesit të emërimeve nga institucioni Drejtoria e Bujqësisë Korçë, prej datës 21.09.2016 e në vazhdim.
4. Për këtë vendim të njoftohet institucioni Drejtoria e Bujqësisë Korçë, Ministria e Bujqësisë, Zhvillimit Rural dhe Administrimit të Ujërave dhe Departamenti i Administratës Publike, si dhe të informohet Komisioni për Çështjet Ligjore, Administratën Publike dhe të Drejtat e Njeriut, në Kuvendin e Shqipërisë.

Ky vendim hyn në fuqi menjëherë.

KOMISIONERI

Pranvera STRAKOSHA